

東

華

錄

東華錄

順治二十九

臣王先謙敬編

臣周倫蕃恭校

秋七月甲辰朝鮮來貢○刑部覆擬革職巡按御史竺重光故出入人罪應減等杖徒准贖永不敘用從之○丙午諭吏刑二部設立都察院衙門原係耳目要職必須以政治得失民生利病據實上聞乃盡職掌豈可將無益之事塞責妄陳變亂成例前魏裔介等具奏請畫一世職云除武功外其別項授給世職若應世襲均應一體准其世襲如不應世襲者亦應一體不准其世襲朕思世職應襲與否皆已定之事況爲人臣者凡事可行不可行必當熟思妥確然後奏請不應如此含糊兩可因敕下伊等云爾等之意欲令其世襲抑不令其世襲耶伊等並不明白覆奏反遮飾云見

未及此實屬愚暗朕思伊等皆身任要職明知久行定例輒請更改其中豈無受託市恩情弊隨傳魏裔介等面加訊問此本係何人倡議受誰屬託爾等務從實直供朕當免爾等之罪若不直供斷不輕恕據魏裔介傳維麟稱此事漢官實未深知係能圖等先具滿字稿翻出令看因而列名並不知受人屬託情由據能圖稱此事漢官不知係納都戶達岱與臣三人意思相同合詞陳奏實未有人屬託據納都戶稱此事臣等同議既而又稱先係能圖說起臣等意見相同遂爾上本並未有人屬託及問達岱枝梧遮飾全無實供據劉兆麒稱係堂官定稿令其翻出漢字並未知原議據鄂通郭亦稱並未知原議是日該臣陪奏所以列名據數多慧隆三莫洛洪朱天定稱臣等各在辦事公所堂官令看臣等意思相同故爾列名等情魏裔介等擢居憲職妄行瀆奏殊負委任今

據各供含糊不一情弊顯然著九卿詹事科道會同詳審確情嚴加議罪具奏達岱經朕面訊諭令實供乃復枝梧遮飾深爲可惡著刑部另行從重議罪具奏○諭禮部江南省在明朝亦係直隸故典試皆用詞臣今既改爲省以後著照浙江一體題差○革職欽天監回回科秋官正吳明炫奏監正湯若望推算天象舛謬三事一遺漏紫炁一顛倒觜參一顛倒羅計得旨奏內三款著禮部察明具奏○丙辰吏部等衙門遵旨會議魏裔介傅維麟能圖納都戶劉兆麒鄂通郭敦多慧隆三莫洛洪朱天定等妄陳條奏變亂成例俱應革職得旨魏裔介傅維麟革職能圖革太子太保加級副都御史並拜他喇布勒哈番納都戶革加級副都御史並拜他喇布勒哈番劉兆麒革加級啟心郎鄂通郭革加級啟心郎敦多慧革加級理事官隆三莫洛洪朱天定革加級理事官並一拖

沙喇哈番俱帶罪留任照舊辦事○丁巳刑部遵旨議達岱條奏
變亂成例及 上面訊時復枝梧遮飾應照奏事不實律革加級
啟心郎並一拜他喇布勒哈番鞭徒准贖從之○庚申諭吏部總
理河務事關重大必得其人方能勝任吏部右侍郎朱之錫氣度
端醇才品勤敏著升兵部尚書兼都察院右副都御史總督河道
提督軍務○己巳裁陝西西安遼寧學教官以平西王屬下生員停
止考試也

八月辛未朔初給事中于沚奏凡係巖疆督撫應察其勤敏廉靜
者加銜以示鼓舞有旨詰問所指督撫爲誰沚以實無所指回奏

上以其市恩溺職命降三級調外用○壬申以王崇簡爲吏部

右侍郎

由國史院
學士遷

○甲戌諭禮部經筵大典理當早舉向因文華

殿未建有旨暫緩今思稽古典學有關治道難以再遲應於保和

殿先行開講爾部卽詳考典例擇吉開列儀注具奏○乙亥先是兵部議覆浙閩總督李率奏鄭芝龍一日不殺成功之心一日不死羣逆之意亦觀望不決恐致仍中狡謀貽禍沿海請敕刑部將芝龍並伊弟芝豹子世忠世恩世廕世默等俱就甯古塔正法妻妾人等入官命議政王貝勒大臣會議尋議應如部擬上審酌再三復令另議至是復議甯古塔地近江海賊船往來叵測芝龍就禁恐有疏虞應加鐵練三條手足杻鎖嚴飭章京兵丁加謹看守從之○丁丑增兵部督捕衙門滿洲主事一○川陝總督馬之先卒予祭葬○壬午論平廣東功將士升授有差○癸未以陝西左布政使孫建宗爲太僕寺卿○轉秦加兆爲江西左布政使由右布政使轉○丙戌贈殉難陵川縣知縣李向禹官○戊子定考覈恤刑各官例○己丑免山西荒地逃丁徭賦○轉杜立德爲刑部左

侍郎以李藻爲刑部右侍郎

由宗人府承遷

○辛卯內大臣伯索尼等

奏遵諭察審刑獄有正法叛犯劉有福妻朱氏係故明泰昌帝女

應免入官交禮部與故明妃嬪一體贍養從之○甲午轉陳煥爲

陝西左布政使

由山東右布政使轉

以白秉貞爲江西右布政使

由四川按察使遷

○丙申海寇鄭成功犯浙江台州府分巡紹台道蔡瓊枝副將李

必及府縣等官俱降賊○丁酉 上發帑銀四萬兩賞八旗貧丁

○戊戌漕運總督蔡士英引疾乞休命回京調理○朝鮮來貢

九月辛丑以亢得時爲兵部尙書兼右副都御史總督漕運巡撫

鳳陽李國英爲兵部尙書兼右副都御史總督陝西三邊四川○

丙午 上初御經筵○以賈漢復爲兵部左侍郎兼右副都御史

巡撫河南

由工部右侍郎遷

○戊申以袁一相爲山東右布政使

由陝西按察使

遷

李棠馥爲四川按察使

由陝西督糧道參政遷

○庚戌敘復舟山功將士

升授有差贈死事者官子弟襲職○癸丑以高民瞻爲右副都御史巡撫四川○癸亥諭禮部日講之典已於十二年四月內舉行後因文華殿未建暫行停止今思講學要務不可復遲茲欲十月內開講先期應於弘德殿告祭爾部卽擇吉具奏○乙丑諭兵部蘇松等處總兵官馬進寶著改名逢知○丙寅固山額眞屠賴等奏官兵復福建閩安鎮投誠大小官一百餘員獲器械印信甚多下所司議敘○戊辰諭禮部自古變不虛生皆因人事昨日入夜地震有聲朕不勝悚惕因思朕卽位十有四年親政已歷七載雖夙夜憂勤勉圖治理但萬幾至繁玩日愒月或致怠荒政事有乖民生未遂以致災譴見告用示儆戒朕今痛加修省文武大小羣臣但當洗滌肺腸力改前過協心盡職務求消弭災異若仍蹈往轍天譴國法具有何由可追此後朕躬或有闕失行政或有錯謬

著內院輔臣據實陳奏毋得隱諱

冬十月庚午朔諭吏部總督巡撫皆封疆重臣事務殷繁近來欽件概有限期屢有參罰未免急於救過草率完結且使督撫以簿書細事多被參處亦非朝廷倚任重臣之意以後欽件有緊要重大者仍與立限其餘俱著各該督撫酌量緩急奏結但不許任意耽延致有廢事若遲至一年者該部查參處分○壬申以開日講祭告先師孔子於弘德殿○癸酉命都統趙布泰等駐防江甯○丙子 皇第四子生○諭戶部朕惟帝王臨御天下必以國計民生爲首務故禹貢則壤定賦周官體國經野法至備也當明之初取民有制休養生息萬厯年間海內殷富家給人足天啓崇禎之世因兵增餉加派繁興貪吏緣以爲奸民不堪命國祚隨之良足深鑒朕荷 上天付託之重爲生民主一夫不獲亦疚朕懷凡服

御膳羞深自約損然而 上帝 宗廟百神之祀軍旅燕饗犒錫

之繁以及百官庶役餼廩之給罔不取之民間誠恐有司額外加
派豪蠹侵漁中飽民生先困國計何資茲特命爾部右侍郎王宏
祚將各直省每年額定征收起存總散實數編列成帙詳稽往牘
參酌時宜凡有參差遺漏悉行駁正錢糧則例俱照明萬厯年開
其天啟崇禎時加增盡行蠲免地丁則開原額若干除荒若干原
額以明萬厯年刊書爲準除荒以覆奉諭旨爲憑地丁清覈次開
實徵又次開起存起運者部寺倉口種種分晰存留者款項細數
事事條陳至若九釐銀舊書未載者今已增入宗祿銀昔爲存留
者今爲起運漕白二糧確依舊額運丁行月必令均平胖襖盔甲
昔解本色今俱改折南糧本色昔留南用今抵軍需官員經費定
有新規會議裁冗改歸正項本色絹布顏料銀硃銅錫茶蠟等項

已改折者照督撫奏定價值開列解本色者照開定價值造入每年督撫再行確查時值題用填入易知單內照數辦解更有昔未解而今宜增者昔太冗而今宜裁者俱細加清覈條貫井然後有續增地畝錢糧督撫按案題造冊報部以憑稽覈綱舉目張彙成一編名曰賦役全書頒布天下庶使小民遵茲令式便於輸將官吏奉此章程罔敢苛斂爲一代之良法垂萬世之成規雖然此其大畧也若夫催科之中寓以撫字廣招徠之法杜欺隱之奸則守令之責也正己率屬承流宣化覈出納之數慎那移之防則布政司之責也舉廉懲貪興利除害課殿最於荒墾昭激揚於完欠恪遵成法以無負朕足國裕民之意則督撫之責有特重焉其敬承之毋忽○辛巳 上幸南苑○乙酉 上於南苑躬擐甲胄率部院三品以上漢官及翰林科道閣武命內大臣及侍衛擐甲馳馬

過 上前二人墜馬 上策馬至其所命扶起問之曰無傷乎願
謂羣臣曰墜馬之人幸無恙也諸臣頓首奏曰臣等竊聞仁爲勇
之本今 皇上集諸臣侍衛嫺習武事見墜馬者親爲慰問誠仁
德之主也 聖恩如此孰不捐軀圖報 上命諸臣序坐諭曰朕
年來屢飭科道各官據實陳奏以廣言路乃不抒誠建議或報私
仇或受屬託或以瑣細之事瀆陳塞責雖巧飾言詞於國家政治
有何裨益今各部院衙門弊端及諸臣行事朕尙有所聞見爾等
豈有不知若明知隱匿不行據實陳奏豈不有玷言官之職以後
宜悉心改悔恪盡乃職若仍蹈前轍決不爾貸又諭諸臣曰爾等
不思朝廷擢用之恩留心部務以圖報效乃徇庇爲奸竟成積習
此豈人臣之誼嗣後宜痛改前行勉圖效力更宜自愛身名毋致
隕越且凡爲父母者生子得入仕途必何等教誨何等期望爾等

能體父母之意公忠爲國仰報朕恩卽無忝爾親矣儻違父母初心恣意妄行身敗名辱尙得爲人類乎凡人妄行非分每謂人不及知爲之無害不知幽隱之際尤宜勤自省治至於各官一蒙擢用益當兢兢業業如何報答主恩如何殫盡職業乃爲善類若甫獲升遷便洋洋自得毫無敬畏便是小人耳朕所嘉者盡職之人所惡者虛言之輩前因地震朕深自惕勵兼命諸臣共加修省王永吉身爲大學士卽宜實加修省反虛飾具疏認罪若云具疏則爲修省不具疏則不爲修省是修省止永吉一人諸臣俱不然矣似此徒博虛名何如盡心實事耶魏裔介爲給事中時杜立德已任都給事中後擢居總憲立德尙在科員因裔介爲給事中時建言可採越眾優升遂至左都御史朕屬望之意非同泛泛邇者陳何嘉謨以副朕懷更定何事以益朕躬耶又諭諸臣曰朕此諭非

卽欲加罪爾等也特開示朕懷冀爾等改行易慮矢誠效力各勉
爲良臣耳今後若復違朕諭國法具在決不少宥諸臣頓首謝曰
臣等惟謹遵 聖諭洗心滌慮以圖報效而已○丁亥發帑金三
萬兩修孔子廟○戊子 上還宮○庚寅加都督僉事蘇州總兵
官梁化鳳爲都督同知統率抽調各營一萬名改爲水師仍駐防
崇明兩協設副將二員各統水師二千名駐防吳淞遊擊六員各
統水師一千名分泊崇明各沙俱屬梁化鳳統轄提督總兵馬逢
知專管陸師裁蘇州總兵官缺從總督卽廷佐請也○甲午先是
給事中任克溥參奏北闕榜放後聞中式舉人陸其賢用銀三千
兩同科臣陸貽吉送考試官李振鄴張我樸賄買得中北闕之弊
不止一事乞 皇上集羣臣會訊事下吏部都察院嚴訊得實奏
聞得旨貪贓壞法屢有嚴諭禁飭科場爲取士大典關係最重況

輦轂近地繫各省觀瞻豈可恣意貪墨行私所審受賄用賄過付種種情實目無三尺若不重加處治何以懲戒來茲李振鄴張我樸蔡元禧陸貽吉項紹芳舉人田耜卽作霖俱著立斬家產籍沒父母兄弟妻子俱流徙尙陽堡主考官曹本榮朱之繩著議處具奏○乙未 昭事殿 奉先殿成

十一月壬寅 上幸南苑○、皇第五子常甯生○癸卯以四川左布政使徐永禎爲太常寺卿○丙午進安郡王岳樂爲親王○工部左侍郎孫肇興以年老致仕○己酉諭禮部國家登進才良特設科目關係甚重況京闈乃天下觀瞻必典試各官皆矢公矢慎嚴杜弊竇選拔眞才始不辱求賢大典今年順天鄉試發榜之後物議沸騰同考官李振鄴等中式舉人田耜等賄賂關節已經審實正法其餘中式各卷豈皆文理不通盡無情弊爾部卽將今

年順天鄉試中式舉人速傳來京候朕親行覆試不許遲延規避

○癸丑轉楊思聖爲四川左布政使由河南右布政使轉王第魁爲江西左

布政使由陝西右布政使轉○乙卯禮部左侍郎辭所蘊以年老致仕○裁

湖廣衡州衛宜章所○辛酉甯南靖寇大將軍固山額真宗室羅

託等奏臣等至荊州宣布 皇上德意僞將多願投誠臣隨遣兵

奪取心潭口往巴東斷渡口於是僞總兵田國欽黃世奎鄧基昌

等及賊渠孫可望標下僞總兵趙世超副將趙三才相繼降○壬

戌偏沅巡撫袁廓宇奏僞秦王孫可望與李定國不協興兵相攻

爲定國所敗遣其僞將程萬里等赴中路鎮臣李茹春右路鎮臣

王平軍前投誠仍請兵復讐可望行至沙子嶺爲僞總兵楊武追

襲幾殆我兵馳援賊方駭散可望因得乘閒攜其妻子來歸計降

僞總兵都督二十二員僞太僕寺一員僞副參遊等一百餘員僞

內官二十二員兵丁家口五百餘名馬羸五百餘匹○先是宗人府劾奏貝子屯齊喀會奏欲於十一月初四日隨飭親王出遊有旨不允後遇朝期輒稱疾不出及初四日駕幸南苑又託病不朝屯齊喀既可隨簡親王出遊駕出何故不朝應行議處上命嚴行議處於是宗人府覆議屯齊喀係不應隨簡親王之人而欲從之遊罪一無病託疾不朝反行巧辯罪一因不准出遊不遂其意及駕出故不肯朝乘閒偷安輕忽朝儀罪一應削爵奪其所屬人員廢爲閒散宗室從之○給事中陰應節參奏江南主考官猶等弊竇多端物議沸騰其彰著者如取中之方章鉞係少詹事方拱乾第五子懸成亨咸膏茂之弟與猶聯宗有素乘機滋弊冒濫賢書請皇上立賜提究嚴訊得旨據奏南闈情弊多端物議沸騰方猶等經朕面諭尙敢如此殊屬可惡方猶錢開宗並同

考試官俱著革職並中式舉人方章鉞刑部差員役速擊來京嚴行詳審本內所參事情及閩中一切弊竇著郎廷佐速行嚴查明白將人犯拏解刑部方拱乾著明白回奏○乙丑大學士劉正宗請假回籍爲伊兄正衡治喪許之○以徐來麟爲河南右布政使

由山西按察使遷

朱衣助爲陝西右布政使

由山東按察使遷

十二月壬申裁諸王教習官○給事中朱紹鳳劾奏河南主考官黃鈇丁澎進呈試錄四書三篇皆由己作不用闈墨有違定例且黃鈇服官向有穢聲出都之時流言嘖嘖及入闈又挾恃銓曹恣取供應請敕部分別處分得旨黃鈇著革職嚴拏察究丁澎亦著革職察議○先是吳明炫與湯若望爭辯水星伏見上命內大臣公愛星阿及各部院大臣同登觀象臺測驗水星不見下法司議罪尋議吳明炫依奏詐不以實律罪應絞援赦請免從之○癸

酉諭兵部輔臣洪承疇前已有旨准解任回京調理近聞病已痊

愈仍著留原任親統所屬將士同甯南靖寇大將軍固山額真宗

室羅託等由湖廣前進相機平定貴州○甲戌以王道賓爲山東

按察使

由廣西桂平道參政遷

卞三元爲山西按察使

由陝西苑馬寺卿遷

○封孫可

望爲義王○乙亥少詹事方拱乾回奏臣籍江南與主考方猶從

未同宗故臣子章鉞不在回避之例有丁亥己酉甲午三科齒錄

可據下所司查議○己卯以楊運昌爲禮部右侍郎

由國史院學士遷

○

癸未敕諭平西王吳三桂固山額真侯墨爾根侍衛李國翰曰逆

賊煽亂雲貴騷擾地方已久今賊李定國與孫可望互相攻戰可

望來降乘此賊黨內亂人心未定之際特命王爲平西大將軍同

固山額真侯墨爾根侍衛李國翰統兵進討爾等統領所屬官兵

及漢中四川各官兵由四川前往貴州相機進攻凡事王與固山

額真會議而行漢中四川仍酌量留兵防守○命固山額真趙布泰爲征南將軍統前去官兵並提督線國安標兵及湖南調發官兵由廣西往貴州相機進取凡事與提督線國安梅勒章京富喀莽吉圖等會議而行○命固山額真宗室羅託固山額真濟席哈統領官兵及經略調取各官兵由湖南往貴州相機進取凡事與固山額真特津佟六十護軍統領鄂爾等會議而行○丙戌以郭鳴鳳爲福建右布政使

由湖廣按察使遷

○甯南靖寇大將軍固山額真

宗室羅託等奏僞總兵譚新傳等率僞官十餘員家屬二千餘名來降下所司察敘○丁亥宗人府議奏郡王以上有大罪赴衙門審問小罪就其府第問之貝勒以下俱赴衙門審問報可○辛卯刑部右侍郎李藻卒予祭葬○丙申以 皇太后疾愈發帑金十萬賚八旗兵及畿輔貧民○是歲人丁戶口一千八百六十一萬

一千九百九十六田地山蕩四百九十六萬三百九十八頃三十畝畦地二萬二千六百四十三箇徵銀二千四百三十六萬六千三百六十五兩七錢有奇米麥豆五百八十三萬五千九百四十石六斗有奇草二百二十三萬二千九百四十七束茶八萬五千五百一十錠行鹽四百七十五萬九十一引

東華錄

順治三十

臣王先謙敬編

臣周澹菴恭校

順治十五年戊戌春正月戊戌朔 上在南苑免朝賀○朝鮮來貢○庚子大赦詔曰帝王孝治天下莫先乎事親近 皇太后聖體違和朕夙夜憂懼賴 聖母懿德素昭仰荷 天眷今已大安邁茲莫大之慶宜沛非常之恩其自王公以下中外臣僚並加恩賚直省逋賦悉與豁免吏民一切註誤咸赦除之○諭禮部朕惟皇后表正宮闈孝敬爲先凡委曲盡禮佐朕承歡 聖母此內職之常也昨者 皇太后聖體違和朕朝夕侍奉食息靡遑皇后身爲子婦平時恪恭定省原屬敬勤無失且承 皇太后篤愛恩眷殊常而此番起居問安禮節殊覺闕然雖蒙 聖母慈恩垂諒而

於朕孝事之誠不無有憾向年廢后之舉因與朕不協故不得已而行之至今尙歉於懷引爲慚德但孝道所關重大子婦之禮昭垂內則非可偶違茲將皇后位號及冊寶照舊外其應進中宮箋奏等項暫行停止著議政王貝勒大臣九卿詹事科道會同議奏尋議欽遵諭旨停其箋奏從之○丙午命信郡王多尼爲安遠靖寇大將軍同平郡王羅可鐸貝勒尙善杜蘭固山額眞伊爾德阿爾津巴思漢卓羅等率師征雲南○辛亥祈穀於上帝上還宮申飭太常寺官肄習雅樂○癸丑以恩詔復左都御史魏裔介等職諭令自後洗心滌慮實圖盡職○甲寅上親覆試丁酉科順天舉人諭曰頃因考試不公特親加覆閱爾等皆朕赤子其安心毋畏各抒實學朕非好爲此舉實欲拔取眞才不獲已爾眾皆頓首稱萬歲○諭禮部朝廷選舉人才科目最重必主考同考官

皆正直無私而後真才始得昨因鄉試賄賂公行情罪重大已將
李振鄴田耜等特置重辟家產籍沒今會試大典尤當慎重考試
官同考官及天下舉人若不洗滌肺腸痛絕情弊不重名器不惜
身命仍敢交通屬託賄買關節等弊或被發覺或因科道指參卽
將作弊人等俱照李振鄴田耜等重行治罪決不姑貸爾部卽刊
刻榜文徧行嚴飭使知朕取士釐奸至意○延綏巡撫馮聖兆以
母老乞終養允之○戊午祀 圓丘○己未祀 方澤○辛酉祀

太廟 社稷以 皇太后疾愈也○ 皇第四子薨○癸亥以

劉興漢爲湖廣按察使

由福建督糧道參政遷

○丙寅以周召南爲右副都

御史巡撫延綏

由大理寺卿遷

二月庚午禮部磨勘丁酉科鄉試硃卷劾奏違式各官河南省考
試官黃沁丁澎用墨筆添改字句山東省同考官同知袁英知州

張錫懌知縣唐瑾吳暹何鏗章貞用藍筆改竄字句山西省考試官匡蘭馨唐賡堯批語不列銜名俱屬疏忽得旨俱著革職逮問○御史上官鉉劾奏江南省同考官舒城縣知縣龔勳出闈後被諸生所尋事涉可疑又中式舉人程度淵嘖有煩言情弊昭著應詳細磨勘以釐夙奸得旨著嚴察逮訊○壬申立興京顯佑宮碑文曰自古帝王統御天下必以仁義爲本尤懋昭恭肅崇祀明神蓋期國祚熙昌俾兆民罔不康甯也欽惟神莫大於昊天而事莫隆於開勑虔格之心益當倍於尋常惟茲興京所建顯佑宮始於我朝締造之初以爲昭事上帝之所所關甚重運祚靈長神實啟之臣民瞻仰神實迪之是以國家膺圖御籙固我太祖武皇帝太宗文皇帝開駿業而肇鴻基本仁德而施政教所致然荷茲天眷者豈非誠敬萬靈懷柔河嶽之故歟夫天無所不

在事 天之心卽宜無時不謹稽王業所自始地擅神皋邇 祖

德所潛通歆居 上帝朕夙夜寅恭冀登上理睠念受命發祥之

地益深欽 天率 祖之思已命所司繕整維新春秋禋祀載表

功德樹豐碑以傳不朽於戲艱難不昧常懷對越之誠丹牘丕彰

永保岡陵之固後之子孫臣庶其無忘朕敬事之意焉○甲戌命

刑部尙書白允謙等分賑畿輔○丙子以張緒彥爲工部右侍郎

由浙江左布政使遷○戊寅工部尙書朱鼎延請假省親允之○庚辰諭禮

部前因丁酉科順天中式舉人多有賄買情弊是以朕親加覆試

今取得米漢雯等一百八十二名仍准會試蘇洪濟張元生時汝

身霍於京尤可嘉陳守文張國器周根邵等八名文理不通俱著

革去舉人○贈殉難拜他喇布勒哈番陳守禮曾大名官子弟襲

職○甲申免順天武清瀋縣去年水災額賦○禮部議覆御史趙

祥星奏會試四書五經題目請 欽定密封送入內簾得旨第一

場四書題目候朕頒發餘著考試官照例出題○乙酉轉王崇簡

爲吏部左侍郎調郝惟訥爲吏部右侍郎

由戶部調

○戊子贈陣歿巴

拜官以其弟襲職○致仕工部尙書謝啟光卒○己丑戶部議覆

奉天府府尹張尙賢奏遼陽人民始集輸納維艱應每畝止徵銀

三分以蘇窮黎從之○庚寅以鍾鼎爲刑部右侍郎

由廣東按察使遷

○

以克閩安鎮功賞海澄公黃梧甲冑貂裘等物○辛卯平西王吳

三桂奏川東僞總督張京總兵張宿兵科謝佩等十八員投誠○

癸巳諭吏部設立內監衙門官員原止令供辦宮闈事務不許干

預朝政交通外廷是以朕於新舊內監各員特立鐵牌屢行禁飭

甚嚴不意乃有行私納賄之徒朕密行采訪得其奸弊已命內大

臣嚴行審擬事內有見任官私相餽遺者亦有罷任官通同賄賂

者深可痛恨此輩壞法通賄科道各官爲朕耳目豈無見聞乃竟不行指參殊負朝廷設立言官發奸摘弊至意爾部卽行傳知○甲午諭吏部等衙門爾等各衙門事務皆天下政治所關最爲重大爾諸臣皆特簡倚任爲朝廷分猷共理之人須當實心效力視朝政如己事深思遠慮以圖盡善乃爲稱職近見各衙門辦事惟因循事例止圖塞責未嘗見有真切盡心者殊負朕委任至意今宗人府內三院六部都察院通政使司大理寺兵部督捕理藩院詹事府太僕寺光祿寺國子監鴻臚寺六科十四道五城御史等各將本衙門一應事務詳悉參酌何事有益國家當遵行何事無益國家當更改並諸凡興利除弊事宜俱著各衙門滿漢大小官員公同商榷具奏○乙未 上御經筵○丙申禮部議覆御史上官鉉奏江南新榜舉人嘖有煩言應照京闈事例請 皇上欽定

試期親加覆試以覈眞僞至直省士子雲集聞務不便久稽其江南新科舉人應停止會試從之

三月辛丑廣西巡撫于時躍奏李定國逆黨閭維龍曹延生等陷橫州防守都司趙連城以眾寡不敵退屯貴縣總兵官馬雄馳援賊棄城遁遂復橫州俘斬甚眾得旨嘉獎下部議敘○壬寅諭禮部科爾沁巴圖魯王之女選進宮中因待年未行冊封今遽爾長逝朕心深切軫悼宜追封爲妃其封號及應行典禮爾部卽察例議奏尋追封悼妃○癸卯予故工部尙書張鳳翔祭葬○甲辰諭吏部內監吳良輔等交通內外官員人等作弊納賄罪狀顯著研審情眞有王之綱王秉乾交結通賄請託營私吳良輔等已經供出卽行提拏其餘行賄鑽營有見獲名帖書柬者有餽送金銀幣帛等物者若俱按迹窮究犯罪株連者甚多姑從寬一概免究官

員人等如此情弊朕已洞悉勿自謂奸弊隱密竊幸朕不及知自今以後務須痛改前非各供厥職凡交通請託行賄營求等弊盡皆斷絕如仍蹈前轍作奸犯法者必從重治罪決不寬貸爾部速刊刻告示內外通行嚴飭良輔尋伏法○諭吳三桂羅託濟席哈趙布泰李國翰等曰朕夙以奉天討罪救民水火爲心是以特命爾等率師南征勦撫機宜俱載前諭今念貴州等處民苗雜處當先加意撫綏安輯民心爾等率領大軍經過府州縣及土司蠻峒等處地方當嚴行約束官兵凡良民苗蠻財物及一草一木勿得擅取惟務宣布仁恩使彼樂於歸附儻官民不遵紀律仍行搶掠者卽加處治以示懲戒爾等所領漢兵一併嚴行禁飭其未闢地方須多發告示徧行曉諭爾等受茲敕旨當恪遵奉行勿致擾害地方以副朕除暴安民至意○乙巳禮部奏自元年以來殿試中

式舉人俱在天安門外伏思 臨軒策士大典攸關應於太和殿

前丹墀考試報可○庚戌 上親覆試丁酉科江南舉人○辛亥

以傅維麟爲戶部右侍郎由左副都御史遷○壬子免湖北襄陽鄖陽荒

地額賦○厄魯特部車臣台吉下車臣俄木布等來貢○甲寅轉

周文葉爲廣西左布政使由浙江右布政使轉以嚴正矩爲廣東按察使由江

西嶺北道參政遷○戊午諭禮部前因丁酉科江南中式舉人情弊多端

物議沸騰屢見參奏朕是以親加覆試今取得吳珂鳴三次試卷

文理獨優特准同今科會試中式一體殿試其汪溥勳等七十四

名仍准作舉人史繼佚詹有望潘之彪洪濟黃樞秦廣之陳翹濱

許允芳張允昌何亮功何炳曹漢馬振飛朱扶上萬世俊黃中釐

粵固韓揆策謝金章許鳳楊大鯤周篆沈鵬舉史爽等亦准作舉

人罰停會試二科方域林大節楊廷章張文運汪席陳珍華廷樾

顧元齡劉師漢夏允光程牧孫弓安葉甲孫長發等十四名文理不通俱著革去舉人○壬戌諭禮部前因 皇太后聖體違和皇后問安禮節稍疏曾降諭旨將應進中宮箋表等項概行停止當時 皇太后聖體甫豫未及奏聞今始奏知朕面奉 皇太后慈諭謂朕昔日之旨篤於事親道理宜然但念皇后方在沖齡未嫻禮節且素切眷愛 慈諭寬仁敬當遵奉嗣後中宮箋奏等項著照舊封進○甲子 上以皇子甫生四月而薨悼之追封爲和碩榮親王○乙丑吏部議覆左都御史魏裔介奏嗣後外省藩司一切事務左右布政應通行辦理右布政不得仍前退避私宅從之夏四月庚午以程之璿爲浙江右布政使由福建按察使遷○辛未賜孫承恩等三百四十三人進士及第出身有差○癸酉 上御乾清門選庶吉士畢諭進士曰朕屢重試典嚴除弊實者實欲得真才

而用之耳。今朕將爾等詳加考試，冀得真才。其中能讀書者，已選庶吉士。餘各照應得品級授職。爾等服官，必效力王家，殫心民社，以盡忠盡庶，不負朕屢次召見簡用之至意。亦無忝爾等父母教育之勛勞也。尙其勉之。○喀爾喀部土謝圖汗等來貢。○甲戌，以平南王尙可喜既加歲俸，因添註其軍功於冊。曰：爾駐紮廣東，同靖南王統領官兵圍困南雄府，有賊三千餘突出西門來犯，擊敗之用雲梯攻克。南雄府殺賊兵六千餘，擒獲僞總兵楊傑、董洪信、鄭國林等，斬之。安定南雄府百姓，又前往韶州府招撫官民，並招撫韶屬六縣，俱各歸順。又同靖南王統領官兵招撫英德、清遠，從化俱各歸順。及抵廣東省城，分汛攻圍，發諭招撫。有僞部院杜永和、遣僞侯伯張月、李云、泰、李建捷等率賊兵七千餘，並廣西僞國公陳邦、傅寵、太監僞伯馬寶等統賊兵萬餘，迎犯。爾督官兵敗之。

擒獲僞副將魏廷相等八員並招撫海寇梁標相等獲船一百五十隻又發官兵先用紅衣礮攻打西關城上礮火矢石交加難以攻克爾親督官兵奮勇攻戰遂克其城殺賊六千有餘百姓底定行令所屬州縣俱各投誠遣官兵招撫增城縣有惠州府收養滿洲五人轉送來京又將所獲僞滋陽王等八人當卽梟示有海寇圍困潮州府爾行諭漳鎮發兵往援賊方敗遁又發官兵恢復肇慶平定高雷廉等府又前招撫海寇梁標相等復行反叛流毒地方爾發官兵擊斬之安定百姓又廣西桂林告變賊犯梧州爾密授將士方略恢復城邑安撫人民聞賊李定國圍困肇慶隨同靖南王統兵前往斬殺賊眾復遣官兵追至四會河口盡殲之又賊將吳子聖率賊兵萬餘並以象隻圍困新會浚壕豎柵晝夜攻城爾親率官兵援剿賊眾驅象迎擊敗之斬數百人遂解新會之圍

又同靖南王統領官兵進援高明李定國遣賊眾來犯爾遣官兵殺賊三百有餘生擒僞總兵武君禧等三十餘員並獲馬贏器械等物又於新會縣山峽口同靖南王固山額真朱瑪喇護軍統領敦拜等擊賊兵斬之獲象一十三隻又撥官兵與敦拜等尾追李定國擊敗賊兵三千有餘獲象一隻又在衡州擊敗賊兵萬餘各府州縣俱經恢復故每歲加俸一千兩所有功績添註冊內○丙子平西大將軍平西王吳三桂固山額真侯墨爾根侍衛李國翰奏官兵敗賊於合州遂進取重慶僞都督杜子香率眾逃竄全城克復下所司察敘○辛巳禮部奏和碩榮親王墳園圯丈地內所有寺廟墳墓宜令遷移得旨民間年久墳墓及供奉神佛之寺廟僧道等爲朕釋子建立寢園之故俱令遷移朕心實爲不忍況羣黎百姓莫非朕之赤子所有墳墓寺廟不必遷移仍著照舊存留

禮部尙書恩格德可作速前往將榮親王新園附近墳主眷屬並寺廟僧道等傳集曉諭俾知朕體恤民隱之至意○壬午以祖建衡爲福建按察使

由山西冀南道參政遷

○癸未免湖廣江夏等七縣十三

年水災額賦○甲申厄魯特部鄂齊爾圖台吉來貢○丙戌諭吏部設科取士原爲授官治民使之練習政事向例二甲授京官三甲授外官同一進士頓分內外未習民事遽任內職未爲得當今科進士除選取庶吉士外二甲三甲俱著除授外官遇京官有缺擇其稱職者升補著永著爲例應如何分別選授兩部詳議具奏○上幸景山觀內大臣及侍衛等騎射上躬擐甲胄置帽爲的騎射三發俱中內大臣侍衛等射中者每矢賞段一疋○內三院議覆宗人府奏皇城爲皇上宸居諸王在內居住所屬人員往來出入難以稽察應遷居於外又諸王以下有係另室侍妾所

生子女向來俱不載檔但天潢一派不行記載竟與齊民無別於典制似有未合應另立檔記載從之○己丑諭內三院翰林各官讀書作文是其職業不加考試何以分優劣別勤惰除三衙門學士外其餘翰林官員朕將親行考試應用等項俱照例備辦○裁京糧廳差歸併坐糧廳管理○直隸河南山東總督張懸錫至順德府迎義王同各大臣宴畢回館舍自到家丁急救未絕有遺奏曰待罪臣張懸錫謹奏臣自蒞任以後矢心願作忠良喜怒不拂民欲是非必告穹蒼意欲平治天下誰知直道難行清白招眾之忌憚直舉國如狂是以滿腔愁鬱因而儀節乖張自知此身必死何如引咎而亡有負 天高地厚從此雲蒼水茫 皇上如念臣積勞數載懷隱中藏幸赦宥乎眷屬永拜德於泉壤嗚呼異世猶圖犬馬此生惜別倉皇臣家無餘蓄亦無良田美宅蒞任後不敢

受地方官一錢以負上恩惜爲人所誤亦天意耳恭繳敕書關防以及未用火牌等項此外別無經手錢糧不暇另開清冊惟恐緹騎至耳皇上如欲平治天下當首禁私徵雜派及上官過客借名苛索之弊不然源之不清欲流之潔得乎皇上嚴禁逃人而地方棍徒每假借逃人之名以行詐此風不息天下不得平也皇上軫恤驛遞而沿河緯夫受過往人役需索陵虐至死者不計其數恐干天和不可不嚴禁也海防已有專疏內地缺額之兵不可不補小民疾苦千緒萬端臣已得其概惜未竟其說夫天果欲平治天下耶直隸巡撫董天機以其事聞得旨總督大臣無故自刎其中必有重大急迫情節著都察院副都御史一員侍郎一員科道二員作速前往確查詳明具奏○辛卯諭刑部等衙門開科取士原爲遴選真才以備任使關繫最重豈容作弊壞法王樹

德等交通李振鄴等賄買關節紊亂科場大干法紀命法司詳加
審擬據奏王樹德陸慶曾潘隱如唐彥曦沈始然孫暘張天植張
恂俱應立斬家產籍沒妻子父母兄弟流徙尙陽堡孫伯齡郁之
章李貴陳經在邱衡趙瑞南唐元迪潘時升盛樹鴻徐文龍查學
時俱應立斬家產籍沒張名孫蘭茁郁喬李蘇霖張秀虎俱應立
絞余贊周應絞監候秋後處決等語朕因人命至重恐其中或有
冤枉特命提來親行面訊王樹德等俱供作弊情實本當依擬正
法但多犯一時處死於心不忍俱從寬免死各責四十板流徙尙
陽堡餘依議董篤行等本當重處朕面訊時皆自認委係溺職姑
從寬免罪仍復原官曹本榮等亦著免議自今以後凡考官士子
須當恪遵功令痛改積習持廉秉公不得以此案偶蒙寬典遂視
爲常例妄存倖免之心如再有犯此等情罪者必不姑宥○免陝

西濱化縣荒地額賦○大學士王永吉以其姪樹德私通科場關節自請處分得旨王永吉乃朕破格擢用受恩深厚未見克盡職業實心爲國負朕簡任之恩王樹德係其親姪豈不知情著降五級調用○壬辰吏部等衙門會議陳之遴陳維新吳維華胡名遠王回子等賄結犯監吳良輔鞠訊得實各擬立決得旨陳之遴受朕擢用深恩屢有罪愆疊經貸宥前犯罪應置重典特從寬以原官徙往盛京後因不忍終棄召還旗下乃不思痛改前過以圖報效又行賄賂交結犯監大干法紀深負朕恩本當依擬正法姑免死著革職並父母妻子兄弟流徙盛京家產籍沒陳維新姑免死並父母兄弟妻子流徙盛京家產籍沒吳維華胡名遠王回子等俱姑免死各責四十板並父母兄弟妻子流徙甯古塔家產籍沒

○乙未諭吏部等衙門前有諭旨令爾等各將本衙門一應興利

除弊等事公同商榷具奏今覽爾等條奏本章重大利弊未經陳奏仍是因循積習止將無益之言浮泛塞責卽如各衙門胥役作奸犯科者實繁有徒朕已灼見爾等尙不明奏朕所未知者尙望爾等盡言乎人臣實心爲國卽不奉旨條陳猶當力除諸弊爲朝廷舉利益之政今特降諭旨爾等尙瞻徇不言殊負朕倚任期望至意仍著悉心計議指摘弊端詳切具奏

五月丁酉朔日有食之○上遣學士折庫訥往訊直隸山東河南總督張懸錫自劉緣由懸錫自陳迎接失儀爲學士麻勒吉所詰責一時惶悚無地遂引佩刀自決具疏奏謝得旨張懸錫係朕特簡畀以總督三省重任卽有錯誤屈抑情節皆當陳奏聽候鑒裁何至遽爾刎頸殊失大臣之體本當罷黜但念其素行清謹姑著降三級調用○戊戌義王孫可望至京命簡親王濟度安親王

岳樂率民公侯伯以下梅勒章京侍郎以上出迎賜茶○己亥
上御太和殿義王孫可望朝見○庚子宴義王孫可望於中和殿
○刑部議覆憲臣魏裔介奏各省舊案堆積甚多若不立法稽察
何由申冤理滯今後各府州縣宜每季造冊一本將罪犯姓名年
月情節及何官未經審結緣由申報道司撫按以備稽察從之○
壬寅御史李森先奏 皇上孜孜圖治求言之詔屢下而兩月以
來大小臣工猶然遲回觀望不肯進言者皆以從前言事諸臣一
經懲創則流徙永錮遂相率以言爲戒耳臣以爲欲開言路宜先
寬言臣之罰如言事流徙諸臣李呈祥季開生李嗣魏琯郝浴張
鳴駿等皆與恩詔因公誥誤之例相符儼蒙俯賜軫恤使天下昭
然知 皇上寬宥直臣雖在遠而不遺則凡有言責者罔不洗心
竭慮以陳言矣得旨李呈祥等犯罪原非誥誤李森先新經寬宥

又係言官不思實心報恩進言有益之事輒敢援引詔款代求赦免明係市恩徇情著吏部從重議處具奏尋議應革職從重送刑部擬罪從之○癸卯諭兵部督捕衙門逃人事宜屢有諭旨念滿漢人民皆朕赤子故令會議量情申法衷諸平允而年來逃人犯法者未止小民因而牽連被害者多近聞有好徒假冒逃人詐害百姓或借名告假還家結連奸惡將殷實之家指爲窩主或原非逃人冒稱旗下在外嚇詐羣黨指稱轉騙不已或有告到督捕買主冒認指詭名作真者或有聲言赴告在地方官處稟拏嚇騙良民者或告假探親肆行指詐及領本貿易假夥攀害種種詐僞甚多深爲可惡今後凡有逃人本主卽報明本固山額真梅勒章京牛录等官將逃人之主及逃人姓名具印結報部如逃後日久方報既獲逃人乃稱係伊家人者此人不許給主卽著入官直省地

方有旗下告假私出妄爲及冒稱旗下羣聚橫行者著該督撫嚴行訪拏解部查明並本主從重治罪八旗牛彘以下及買賣人等

俱著通行嚴飭並傳諭內外咸使知悉○調衛周祚爲吏部尙書

由工部調

以錢朝鼎爲左副都御史

由浙江按察使遷

○以董顯忠爲河南按

察使

由福建福甯道參政遷

翟鳳翥爲陝西按察使

由江西興屯道副使遷

○甲辰浙

江巡撫陳應泰以病免○吏部議奏向例新科進士授職內則主

事中行評博外則知州推官知縣皆照甲第分別除授今旣不分

二甲三甲俱選外官恐數年後遂無應補中行等官今議除候選

者補完外遇有中行等官缺出亦於推知內俸深者升轉如遇五

部主事一同出缺先儘升主事次升中行評博從之○定義王孫

可望頂帶坐褥儀仗等物其長史等官及護衛俱視多羅郡王例

○乙巳賜義王孫可望宴於其邸舍○戊申復賜義王可望宴於

其邸舍○諭吏部選法壅滯弊在仕途繁雜官吏胥之弊相沿已久其奸詭巧詐最爲隱祕吏部書役更爲狡猾不但四司互相作弊且連結各部書役一切往來文移皆相交通豫藏弊端令外人不得而知任其營利行私卽偶被發覺更有彼此推託卸責避罪之術是以雖有糾參不能窮其作弊根源惟衙門堂官一秉至公精明稽察杜絕請託則司官儆省大破因循情面積習事事詳查將從前隱藏情弊立時摘發呈堂參處吏弊旣清選法方得疏通今官吏乘機作奸報缺到部則於開單取選之時任意遲速以遂貪私參罰開復則於各部咨付之間蒙混稽留以待營競大選急選雖有定期應補之缺不肯盡數開出應選之官未盡均平察取往往擇地之遠近美惡以待人因人之靜聽奔營以出缺各部參罰官員初咨吏部盡開名數後陸續開復則零星咨送文選考功

兩司書吏通同作奸某官既經關說則註某官已曾開復未經關說則仍註初參降罰不註開復上下其手交相蒙蔽種種弊端摘發難盡此皆堂司官平日不嚴行察糾以致筆帖式書吏等肆行無忌今後堂官嚴飭司官盡力釐剔務絕前弊至於督撫按臣舉劾方面有司官每每舉者數十人劾者不數人庸碌之官徒令糜祿廢事久占地方員缺此皆選法壅滯之由也今當疏通選法會試鄉試斟酌舊例量減額數舊例舉人會試三科乃准揀選就教者不拘年分今將遠省舉人酌議仍舊其餘直隸近省舉人會試五科方准揀選會試三科方准就教各項貢監已考定職銜者過堂之時滿漢公閱察其年力衰老者照遙授職銜例給與頂帶不必除授此外有因難於久候情願告降者許呈明察准嗣後除歲貢照舊外其餘貢監考職每名止取正印八人餘俱以州縣佐貳

用告降遙授俱照舊例行吏員初選止予九品以下職銜不得越授至於奸吏作弊責成司官按日清察堂官不時稽覈如司官不行舉發卽治以通同作弊之罪堂官不能覺察卽治以徇庇之罪此外吏胥情弊尙有何法窮詰選人考授更當如何變通著會同九卿詹事科道一體詳議具奏○諭戶部年來錢糧匱乏屢經會議未能實濟急需皆由費用繁多積弊未革今惟再籌裁省嚴剔弊端乃可漸致充裕在京各衙門官有一缺而設數員者半屬閒冗著各衙門將滿漢司官自筆帖式以上俱開列員數職掌奏請裁定在外文武各官如有贅員亦量行裁減各省於順治元二年閒開報荒田甚多連年雖奉清察未見報明其中豈無豪強隱占官吏欺蒙上下推諉不肯清出實數按期徵收隱漏錢糧爲數不少江南蘆政一項地方廣遠漫衍數省連年雖經行察其中隱混

未清者甚多責成撫按嚴行確察又江南無錫等縣歷來錢糧欠至數十萬地方未見有大破積弊徵比完結者皆由官吏作弊上官不行嚴察且鄉紳舉貢之豪强者包攬錢糧隱混抗官多占地畝不納租稅反行挾制有司有司官不能廉明自守者更懼其權勢不敢徵催該部遇有如無錫等州縣之欠錢糧者察明奏請選擇廉明謹慎滿洲啟心郎理事等官先往一縣不帶多人不預別事專令督理拖欠錢糧或錢糧在官借口民欠或鄉紳及其子弟舉貢生員土豪隱占地畝抗不納糧或畏懼豪强不敢徵比等項情弊務期察明懲治清察一處即可爲他處榜樣歷年各省逋欠錢糧多係貪官猾吏那移隱蝕以及鄉紳舉貢生員土豪影射占隱年來撫按未行清察不能盡釐奸剔弊之職今責成撫按嚴加清察如有前項情弊題參重處如曲庇不行指參本犯一經發覺

卽治撫按以徇縱之罪至於那借侵蝕諸弊有在藩司者有在司者互相蒙隱奸弊百出雖嚴行追比而完解無多或借端脫卸攀累無辜或飾稱產盡希圖豁免責成巡撫不時稽覈巡按巡歷一處將藩司經承及府州縣吏書提集按冊磨對當面質訊各省地丁錢糧向來屢奉清察奏報者少況兵荒之後冊籍無存豈無欺隱之弊今責成撫按大破情面徹底清察如仍前徇庇別經發覺卽治撫按以溺職之罪又胥役侵蝕錢糧往往假他人名色置買田產及事發追比則動稱無產承追之官不行嚴比反聽其優游延緩是以積欠愈多嗣後凡奸胥弊發賊銀能完與否卽當清察勒限完結逾限不完卽行治罪不得姑息縱容稽延歲月其他人代爲胥吏影占田產者承追官嚴加清察重行治罪又地方有司奉有供應之文卽借名橫行科斂且於正項之外暗徵私派今

責成撫按嚴行清察題參重處以上種種情弊雖因在外撫按屢奉諭旨不能恪遵亦由部中司官筆帖式書吏交通容隱徇庇行私之所致也今後堂官宜隨事嚴加詳察盡革弊端使司官等知所畏懼如仍前因循曲庇不肯大破情面書吏等事一經發覺卽治司官筆帖式之罪堂官不行糾舉一同議處著會同九卿詹事科道詳議具奏○以劉昌爲工部尙書原任刑部尙書○辛亥贈陳歿昂阿周鼎官○兩廣總督王國光奏澄海遊擊劉進忠知縣祖之麟典史江景雲叛從海逆縣城被陷○王子學士折庫訥左副都御史能圖侍郎霍達給事中王益朋御史高爾位等遵旨以麻勒吉祁徹白胡兆龍口供與張懸錫質對因據懸錫口供上聞得旨張懸錫係大臣非有迫切急情豈肯輕生自刎今察問張懸錫又畏懼麻勒吉等不敢盡吐實情質審諸臣亦瞻徇麻勒吉等不行詳

察著吏部詳察議奏○九卿詹事科道遵旨會議銓法事宜凡降革丁憂病故各官科鈔咨文到部選司卽與開單不得遲誤參罰開復等事科鈔到部卽照限期奏覆如某衙門稽留卽行查參大選急選應補之缺嚴責司官每日詳查缺簿不時呈堂稽考參罰官員陸續開復日考功司卽行說堂依限具覆命下後卽付文選司註銷不得遲延督撫按舉劾各官其庸碌者許不時查參不得徇庇貽誤地方薦舉大省不過十人小省不過三四人不得充數濫舉其有舉無効者不准註冊仍聽該部院參處會試進士每科三百名應酌減一百名其鄉試舉人照各省額數減半以上各款並舉人揀選就教貢監除授考職吏員援納職銜吏胥作弊堂司連坐數事俱遵旨行至於窮詰吏胥作弊之法以後見在衙門舊書役每月朔令同衙門吏胥各具連名保結送該管官存案如有

作奸發覺將本犯與同謀受贓者一體治以重罪有知情不舉者
審出卽不受贓亦減一等治罪其互結之人卽不知情亦治以失
察之罪有能舉首到官者役滿免考卽選其犯事革退吏胥責令
五城嚴查驅逐不許潛住在京串通作弊其服役年滿者應照咨
送吏部考職遺缺不許自引下手俱聽吏部咨行各省巡撫揀選
端慤之人查取甘結咨送吏部照缺發各衙門補用至於變通選
人考授之法舉人已經考定職銜見在候選者除遠省照舊選授
外其直隸近省地方亦照揀選例自中舉年計算係已過五科者
許其取選如未及五科者不許取選發回會試五科不第後許照
原定職銜補用貢生已經考定職銜見在候選者亦應照舉人就
教例自起貢年計算係已過三科者許其取選如未及三科者發
回科舉三科不第後許照原定職銜補用其未考職貢生照此例

行得旨督撫按薦舉原因吏治爲據因地限人是否妥便鄉會試減去額數多寡未均俱著再行確議具奏餘俱依議行○免山東十一年以前竈丁逋課○戊午吏部議覆憲臣魏裔介奏舉用孝子授官從未有例但孝行關繫風化若有司呈報果有正直孝子許撫按嚴行體勘詳開事實具奏禮部覆覈眞確敕臣部考試酌量選授縣正佐貳等官如有冒濫捏報將原舉官參處從之○己未上較射於景山○辛酉諭吏部詹事府未有職掌著暫裁見任官另行補用○給事中姚延啟奏今日進言者多實見施行者少皇上每事必下部議比覆請又皆俞允是權歸六部也請自今許啟奏之臣隨奏入對皇上親裁庶政斷自宸衷庶可決羣疑考議論而別人才矣上以不諳治理切責之○壬戌廣西巡撫于時躍奏僞寶康侯賀九儀竊踞大甯遣僞鎮曹友等率黨數

干突犯賓州遊擊劉彥明等分布官兵擊敗於丁橋斬獲甚多下
兵部議敘○癸亥以胡世安衛周祚李霽爲內院大學士○甲子
甯南靖寇大將軍固山額真羅託等奏克復湖南沅靖等處進取
貴州省城及平越鎮遠等府先後共招降僞官兵丁四千九百九
十餘人男婦九千八百餘名口獲馬一千四百餘匹象十二隻征
南將軍固山額真趙布泰亦報大兵已抵貴州所過南丹州那地
州撫甯司各土司兵民及獨山州官民俱就撫優旨嘉獎命兵部
俟事平察敘○乙丑以毛一麟爲浙江按察使由山東登萊
青道參政遷○議
政貝勒大臣會推直隸總督得旨向因地方初定特設直隸總督
以資彈壓今可不設但直隸八府幅員遼闊著再添巡撫一員分
行管理其駐紮處所及管轄地方吏部酌議妥確並應用撫臣卽
行會推具奏○內院會同吏禮二部議准科臣王命岳奏恩拔優

貢各途已經暫行停止惟有功貢准貢雖爲數不多亦宜停止至副榜貢應照舊額解卷與中式者一體磨勘准爲貢生俟三科不第後方准考職從之○吏部議覆御史石維崑奏各衙門觀政進士聽堂官約束學習政務久已遵行無容再議得旨進士觀政原以學習政務正當嚴飭實行何得但云無容再議常見覆奏本章多用此語皆不肯實心詳議止圖苟且了事甚屬不合著再議

六月丁卯朔調孫廷銓爲吏部尙書○以劉達爲兵部左侍郎

由大理寺卿遷

李棠馥爲兵部右侍郎

由四川按察使遷

○戊申平西大將軍平西

王吳三桂等奏臣等收復重慶卽統兵進發逆首李定國劉文秀遣僞將軍劉正國等率賊眾隻在三坡紅關等處據險設伏以拒我兵臣等令馬步相兼步步督戰節節前進賊遂奔潰我兵疾追賊由水西遁入雲南臣等收復遵義府並所屬州縣招撫僞總

兵及副參遊等官計降賊兵五千有餘臣等隨抵貴州有僞總兵

梁杰英等擁賊三千有餘屯開州拒守我兵奮勇分擊賊大敗陣

斬賊二千有餘獲其象馬器械遂克開州 上嘉獎之命事平日

議敘○辛未以趙廷臣爲右僉都御史巡撫貴州由湖廣督糧道參議遷以

經略大學士洪承疇薦舉也○一甲一名進士孫承恩坐胞弟賜

科場事應連坐流徙 上特宥之○壬申調佟國器巡撫浙江以

蘇宏祖爲右副都御史巡撫南贛由左僉都御史遷○丙子福建巡撫劉

漢祚奏提督馬得功梅勒章京傅大受等破海寇於白沙斬馘無

算下所司察敘○兩廣總督王國光有疾奏請回旗調理允之○

辛巳歸併宣大二鎮學政於山西提學道管理○以李棲鳳爲兵

部尙書兼右副都御史總督兩廣由廣東巡撫遷○甲申以王崇簡爲禮

部尙書由吏部左侍郎遷○丙戌以李紳霄爲四川按察使由江南江甯道參政遷

○辛卯裁大理寺評事二○原任總督張懸錫奏臣以迎接失儀錯誤甚大悔罪勿頸迷謬益深仰荷鴻慈從寬降調方擬交代入覲 天顏乃因學士折庫訥等質問一疏奉有張懸錫畏懼麻勒吉等不敢盡吐實情之旨部議令臣赴部面質理應靜候惟是臣恭繹明綸仰見 皇上日月之明無所不燭臣至今日有不敢終隱之實情又不敢徑懇之部臣者謹瀝陳於 皇上之前伏惟迎接一事大典攸關雖因扞行臣實未諳致有錯誤實出無心乃諸臣之待臣也不以禮始而倨傲之不與見既見而鄙薄之不與坐不與言侮辱情狀誠所難堪然臣猶再三求見再三求教怡色下氣婉而受之者非畏懼麻勒吉等也臣既以失儀之故得罪 朝廷何敢復與諸臣爭禮受屈受抑固所應爾但冀此一念悔罪之誠或可轉達於 天聽卽受屈受抑於諸臣亦所甘心詎意麻勒

吉因臣悔懼之後愈爲責備之辭始則正告以失儀之言而繼則漸露彼苛索之意一則云前日我們往湖廣去時爾在山東豈不見小報何爲不來迎接再則云我們到南邊洪經略差人遠接餽遺日日來見何等小心此皆麻勒吉責臣失儀後之言而臣前供所未陳者也又祁徹白諷臣餽送駝羸臣展轉思維諸臣奉命之楚路經真順時臣正閱視登萊海汛相距千里勢難舍未竟之事來而復往而使臣猶以臣失迎爲罪則其苛求已可概見至於引南中之禮節索此處之駝羸則使臣之以餽遺諷臣也更顯然矣使臣所言者駝羸而其意恐不止駝羸也賄賂黨與朝廷首禁臣若屈意從之將行賄乎抑結黨乎臣甯就死必不敢從臣旣不從則觸諸臣之怒諸臣旣怒則臣卽處身無過猶將別有吹求况臣實已失儀勢必謂臣有心怠慢爲人臣而敢有心怠慢罪不容

於誅臣當時心神昏迷舉止錯亂計無復之惟有一死遂不覺草奏之狂謬而引咎之倉皇迫切急情實盡於此今蒙 皇上天語諄切推見至隱臣若將此段終於不吐臣誠畏懼麻勒吉等而不畏懼 皇上之明綸欺蔽之罪更不可追矣得旨張懸錫以總督大臣輕生自刎必有偏迫情狀朕已知及故特詳察今據張懸錫憑吐實情麻勒吉等因事責備借端苛索種種情弊有據麻勒吉等係簡任近臣奉命出差乃敢於偏迫大臣任意妄行負朕委任之恩深爲可恨著九卿科道會審從重議處具奏○壬辰免湖南靖州沅陵等十五州縣及平溪等九衛所額賦○癸巳浙閩總督李率奏鄭逆擁眾直犯溫郡平陽瑞安俱陷全浙震動請敕就近調發江甯滿兵援剿以固疆圉下所司議○甲午禁京城北面一帶不許掘土開窯燒甓以固龍脈○裁通政使司理事官二

朝鮮來貢

臣周潤蕃恭校

秋七月己亥裁宣大總督及巡漕御史停督撫年終薦舉及內外文武四品以上官送子弟入監從內院大學士覺羅巴哈納等請也○癸卯裁戶部旗分理事官副理事官各一○贈陣歿諸門達賴官○甲辰內大臣巴圖魯公鰲拜等會審廣東雷州道王秉乾以地方僻遠希圖規避賄屬內監吳良輔撤回另選得實擬立斬得旨王秉乾著免死革職籍沒鞭一百發甯古塔給披甲人爲奴○戊申巡視西城副理事官春堆奏原任總督張懸錫於本月十二日自縊於聖安寺○裁吏部滿洲理事官副理事官每旗各一○己酉以王宏祚爲戶部尙書由左侍郎遷○以潘朝選爲兵部左侍

郎兼右副都御史巡撫保定

由禮部右侍郎遷

董應魁爲兵部左侍郎兼

右副都御史巡撫廣東

由刑部右侍郎遷

○裁國子監八旗漢書教習四

漢博士一助教四學錄二○庚戌鎮守甯古塔昂邦章京沙爾虎

達等奏擊敗羅刹兵獲其人口甲仗等物命兵部察敘以所俘獲

分賜有功將士○辛亥以巴格爲專理漕運侍郎

由戶部啟

○裁

六科給事中各一○壬子裁中書科中書舍人四○轉郝惟訥爲

吏部左侍郎以梁清寬爲吏部右侍郎

由國史院學士遷

轉傅維麟爲戶

部左侍郎以杜篤祐爲戶部右侍郎

原任

○裁行人司行人六○丙

辰裁禮部漢軍侍郎○戊午遣官齎敕諭喀爾喀部車臣汗土謝

圖汗丹津喇嘛墨爾根諾顏等仍賜以衣帽器幣等物敕曰朕觀

爾等審知天命凡一詔下靡不敬從令四台吉詣闕謝罪朕悉從

寬宥遣大臣前往爾於使臣前不違詔旨誠心誓好遂每年貢獻

方物遣使來朝朕甚嘉悅罔有異視德音有加錫爾殊恩特遣大臣賜之敕諭自茲以往其益加恪順以效忠貞上報恩施膺茲寵眷以慰朕柔遠至意果忠誠罔懈以獲天眷以承國恩奕世永享太平之福矣○諭吏部自古帝王設官分職共襄化理所關甚鉅必名義符合品級畫一始足昭垂永久用成一代之典本朝設內三院有滿漢大學士學士侍讀學士等官今斟酌往制除去內三院祕書弘文國史名色大學士改加殿閣大學士仍爲正五品照舊例兼銜設立翰林院設掌院學士一員正五品照舊例兼銜除掌印外其餘學士亦正五品以上見任各官俱照本品改銜供職以後升授銜品俱照新例內三院舊印俱銷毀照例給印內閣滿字稱爲多爾吉衙門漢字稱爲內閣翰林院滿字稱爲筆帖黑衙門漢字稱爲翰林院其侍讀學士以下員數官銜滿名照漢官稱

謂通著察例詳議具奏六部滿漢尙書俱作正二品滿字仍稱阿
里哈昂邦漢字仍稱尙書滿漢侍郎俱作正三品滿字仍稱阿思
哈尼昂邦漢字仍稱侍郎理事官滿字稱爲一齊下喇哈番漢字
稱爲郎中俱作正五品副理事官滿字稱爲愛惜喇庫哈番漢字
稱爲員外郎俱作從五品主事滿字稱爲額者庫哈番漢字仍稱
爲主事俱作正六品司務添設滿官漢字仍稱爲司務滿字仍稱
爲他庫喇布勒哈番俱作從九品都察院左都御史滿字仍稱爲
哈思戶額爾機阿里飛拜察喇昂邦漢字仍稱爲左都御史俱作
正二品左副都御史滿字仍稱爲哈思戶額爾機阿思哈尼拜察
喇昂邦漢字仍稱爲左副都御史俱作正三品左僉都御史滿字
仍稱爲哈思戶額爾機阿達飛拜察喇昂邦漢字仍稱爲左僉都
御史俱作正四品監察御史滿字仍稱爲拜察脈拖喇哈番漢字

仍稱爲監察御史俱作正七品經歷改爲司務添設滿官漢字仍稱爲司務滿字稱爲他庫喇布勒哈番俱作從九品通政使司通政使滿字仍稱爲阿里飛哈分布勒哈番漢字仍稱爲通政使俱作正三品左通政滿字仍稱爲哈思戶額爾機哈分布勒哈番漢字仍稱爲左通政俱作正四品右通政滿字仍稱爲一齊額爾機哈分布勒哈番漢字仍稱爲右通政俱作正四品左參議滿字仍稱爲哈思戶額爾機愛惜喇庫哈番漢字仍稱爲左參議俱作正五品右參議滿字仍稱爲一齊額爾機愛惜喇庫哈番漢字仍稱爲右參議俱作正五品經歷改爲司務添設滿官漢字仍稱爲司務滿字稱爲他庫喇布勒哈番俱作從九品大理寺卿滿字仍稱爲阿里哈哈番漢字仍稱卿俱作正三品少卿滿字仍稱爲一爾希哈番漢字仍稱爲少卿俱作正四品寺丞滿字仍稱爲惜喇脈

哈番漢字仍稱爲寺丞俱作正五品寺正滿字仍稱爲寺依一齊
下庫漢字仍稱爲寺正俱作正六品寺副滿字稱爲寺依愛惜喇
庫漢字仍稱爲寺副俱作從六品評事滿字仍稱爲額者庫漢字
仍稱爲評事俱作正七品司務添設滿官漢字仍稱爲司務滿字
稱爲他庫喇布勒哈番俱作從九品各衙門見任各官俱照本品
改銜供職以後升除銜品俱照新制凡改定官名通行傳諭至各
衙門滿漢啟心郎原因諸王貝勒管理部院事務而設今宗人府
啟心郎仍照舊其餘部院滿漢啟心郎俱著裁去照原品另用其
太常寺等衙門滿漢官名品級著一併詳議畫一具奏○九卿科
道會議麻勒吉胡兆龍祁徹白均應革職籍沒家產麻勒吉祁徹
白各鞭一百爲奴胡兆龍責四十板流徙尙陽堡得旨侍郎祁徹
白革去拜他喇布勒哈番併所加之級學士胡兆龍革去尙書銜

併所加之級麻勒吉革去所加之級再降二級俱仍畱原任所給各項誥敕俱行追奪○添各道御史三十○更定鄉會試額數減其半○己未諭吏部都察院見在御史甚少不足供差遣之用前旨行取各官尙未到齊著暫於各部郎中員外郎主事內察取才品堪用者改授御史差用以後除授御史仍照行取考選例行○諭吏部浙閩舊設總督一員今海氛未息幅員遼闊勢難兼顧除見任總督外著再設一員分理兩省軍務爾部卽會推堪任者引見其各駐紮地方一併議奏○免湖南桂陽衡陽等十州縣去年被災額賦○辛酉刑部議河南主考黃鈇丁澎違例更改舉人原文作程文且於中式舉人硃卷內用墨筆添改字句黃鈇又於正額供應之外恣取人簞等物黃鈇應照新例籍沒家產與丁澎俱責四十板不准折贖流徙尙陽堡○免鈇澎責如議流徙○癸亥

裁六部繙譯清字主事各一○固山額真侯墨爾根侍衛李國翰

卒於軍○甲子以趙國祚爲兵部尙書兼右都御史總督浙江

由固

山額真駐紮溫州改閩浙總督李率泰爲福建總督○乙丑裁禮部

理事官副理事官四鑄印局理事官一筆帖式哈番一會同館通

官四兵部理事官副理事官八種馬場章京六筆帖式四大庫馬

場理事官一刑部理事官副理事官四漢員外郎主事各四工部

理事官副理事官八營繕虞衡都水每司漢員外郎一都水司主

事一管理三山郎中一節慎庫大使一寶源局大使一竹木局大

使一通州輦廠所所副一臨清輦廠所所丞一營繕所所正一都

察院經歷司理事官一筆帖式哈番二京畿道理事官一五城滿

洲理事官各一光祿寺副理事官二署丞四太僕寺副理事官一

漢正卿一少卿一寺丞一鴻臚寺漢少卿一寺丞一序班十隨堂

八月丁卯裁鑾儀衛滿洲治儀正四整儀尉二漢治儀正二整儀尉四經歷一○壬申裁光祿寺員外郎二署丞四○丙子遣章京魏黑傳達禮額塔薩璧齋敕二道往諭信郡王多尼固山額真宗室羅託曰固山額真趙布泰等由廣西前進兵力單弱宜行增遣除前往每牛录一護軍及甲士外今增遣固山額真宗室羅託所率前鋒官兵並將信郡王所率每牛录護軍五名羅託所率每牛录護軍二名內擇馬力壯者每牛录出護軍二名其章京量所出護軍名數撥出付濟席哈率往固山額真趙布泰軍營一同前進信郡王統領騎兵全軍並每牛录護軍四名前進其經略洪承疇或於貴州之貴陽府或於他處形勝之地從便屯紮將固山額真宗室羅託所率每牛录兵一名每旗官一員令梅勒章京一人統

領同駐其餘每牛录護軍一名兵四名羅託領之俟信郡王軍至
卽還駐荊州爾等身在彼處知地理遠近此三路進兵必須度量
程途約期並進毋得參差致有疏失其一切進取機宜未可懸度
指授爾等擇便相機而行凡事悉與經略洪承疇商酌往廣西官
兵或少馬匹可將羅託下將士之馬照數給發其所給馬匹明白
造冊送部今自京城已發有馬匹往羅託軍中到日分給將士諭
固山額眞趙布泰曰茲遣固山額眞濟席哈與其同往之梅勒章
京等及羅託所率前鋒官兵每牛录護軍二名往益爾軍至日爾
與固山額眞濟席哈暨梅勒章京等凡事公同商酌其進取機宜
未可懸度指授爾等擇便相機而行敕書到日可卽駐師俟濟席
哈等至一同進發 上復面諭魏黑等曰爾等至彼處可齊集兩
王貝勒貝子公固山額眞及夸蘭大等諭以撫循士卒當如父之

愛子行軍必敬慎隄防謀事無失毋得驕矜躁急致有疏虞夫士
在行間固當有進無退而克敵制勝有貴懼以成謀前敬謹親王
及訥爾特等之敗皆以輕敵躁進故也至投誠之人當分別其傾
心效順或事急來降卽事急來降者亦皆當收養縱有逃亡聽其
自去始足彰我恩育之仁夫以威服人何如以德服人之爲愈也
其平西王固山額真墨爾根侍衛李國翰等亦以此意諭之○子
彝陵死事游擊葉汝壽蔭○吳三桂奏僞興甯伯王興爲李定國
調赴雲南將卒家口畱駐綏陽臣兵至桐梓興子僞總兵王友臣
差僞中軍朱尙文迎赴軍前投順興亦自雲南脫歸謁見又有僞
侯僞將軍等共帶家口七千餘及水西宣慰使安坤等投誠○乙
酉逆賊譚詣等率眾犯重慶命總督李國英統官屬兵丁入川撲
剿○子故致仕工部尙書謝啟光祭九次造墳安葬謚僖敏○浙

江巡撫陳應泰奏八月初九初十等日颶風大作賊船飄散官軍瞭其所向分兵追剿當陣生擒及投誠共九百餘名並獲關防器械甲馬等項逆賊子屬沈溺喪氣歸巢得旨探明逆賊鄭成功的在何處相機圖剿其有功人員著議敘○癸巳 上御經筵

九月丙申裁陝西鞏昌府隴右巡道○己亥故明崇陽王朱蘊鈴攜家投誠命戶部從優收養務令得所○辛丑諭吏部前諭內三院大學士改爲殿閣大學士照例兼銜察舊例有中極殿文華殿武英殿文華閣東閣等名兼有尙書侍郎等官加有公孤宮保等銜今應設中和殿保和殿文華殿武英殿文淵閣東閣大學士照例兼銜辦事○壬寅葬悼妃○遷東京 祖陵於興京○癸卯諭理藩院朕覽爾衙門奏章於死罪重犯但稱處決何以毫無分別人命所關至重大辟條例多端若概爲一例則輕重何辨著議政

王貝勒大臣會議定例具奏○丁未以員盡忠爲浙江右布政使

由山東督糧道參政遷

○戊申諭吏部嗣後應加級官員著照應加之級定

議兼銜其加級著停止○裁上林苑監林衡署署丞○己酉以能

圖爲左都御史

由左副都御史遷

○甲寅改大學士覺羅巴哈納金之俊

爲中和殿大學士兼吏部尙書額色黑成克鞏爲保和殿大學士

兼戶部尙書蔣赫德劉正宗爲文華殿大學士兼禮部尙書洪承

疇傅以漸胡世安爲武英殿大學士兼兵部尙書衛周祚爲文淵

閣大學士兼刑部尙書李蔚爲東閣大學士兼工部尙書○戊午

以周天裔爲湖廣按察使

由浙江督糧道參政遷

○己未免福建福州興化

建甯三府福甯州十二年十三年荒地賦○辛酉諭吏部少傅兼

太子太傅大學士加一級甯完我效力多年勤勞素著近因年邁

有疾著以原銜致仕以遂頤養昭朕優眷至意○癸亥發帑金賜

出征軍士家口

冬十月丁卯湖廣總督李蔭祖奏報水災情形得旨據奏漢天潛
沔一帶水災異常窮民無食無居難以聊生採取焚糶艱苦不堪
深軫朕懷著該督撫按督同各地方官速圖多方拯恤務令得所
○庚午賜義王孫可望銀一萬兩○壬申喀爾喀部畢席勒爾圖
汗等來貢○乙亥大學士傅以漸乞假葬親允之○以王永吉爲
左副都御史由太常寺少卿遷○授陣歿柳應科官○戊寅以徐爲卿爲
江南左布政使原任浙江左布政使○己卯賜劉災等武進士及第出身有
差○庚辰贈死事黃巖縣知縣劉登龍官○壬午以祖重光爲右
副都御史巡撫順天由山西右布政使遷○裁陝西鄜綏德二州州判膚施
中部二縣縣丞綏德州榆林衛訓導銀川青陽奢延魚河園林張
村驛驛丞○湖廣總督李蔭祖奏荆襄安陸等屬霪雨江溢漂沒

萬餘人命所司多方拯卹之○喀爾喀部土謝圖汗丹津喇嘛等來貢○癸未裁山西大同府南路通判一○壬辰授義王孫可望屬下陳傑等官有差

十一月甲午朔福建巡撫劉漢祚奏海寇竊踞永甯崇武等澳聯

踪飄忽屢犯洛陽內港等處提督馬得功遣參將甯獻功等進剿

斬獲無算○戊戌以王舜年爲山西右布政使由江西按察使遷○庚子

禮部等衙門會議宮闈女官名數品級及供事宮女名數乾清宮

設夫人一位秩一品淑儀一人秩二品婉侍六人秩三品柔婉二

十人芳婉三十人俱秩四品尙宮局尙宮司紀司言司簿各二人

司閤四人女史六人尙儀局尙儀一人司樂二人司籍司賓司贊

各四人女史三人尙服局尙服一人司仗四人司寶司衣司飾女

史各二人尙食局尙食一人司饌四人司醞司藥司供女史各二

人尙寢局尙寢一人司設司鐙各四人司輿司苑女史各二人尙
績局尙績一人司製四人司珍司彩司計女史各二人宮正司宮
正女史各二人俱秩六品慈甯宮設貞容一人秩二品慎容二人
秩三品勤侍無品級定數從之○壬寅諭吏部蘇納海鄂莫克圖
著以吏部侍郎兼中和殿學士布顏尼滿著以禮部侍郎兼保和
殿學士查布海白色純著以禮部侍郎兼文華殿學士常爾麻勒
吉著以禮部侍郎兼武英殿學士胡兆龍著以禮部侍郎兼文淵
閣學士艾元徵著以禮部侍郎兼東閣學士折庫訥王熙著以禮
部侍郎兼翰林院掌院學士○乙巳裁薊州道歸併通密道改爲
通薊道以通密道所轄密雲平谷二縣歸併昌平道改爲昌密道
○丙午裁內閣蒙古侍讀學士一侍讀二滿洲漢軍漢典籍各一
○戊申諭禮部朕撫御萬方中外臣民皆同一視朝鮮恭順有年

尤廬體恤聞遣使該國多員貿易滋擾朕心殊爲不忍嗣後凡有事差往使臣止用正使副使各一員務擇諳習禮儀任事謹恪者其八分人員隨往及貿易俱行停止若遇有審察事情該部酌其事之輕重奏請選差以昭朕字愛藩服至意○庚戌以韓信辰爲江西按察使

由直隸井陘道副使遷

○甲寅禮部尙書恩格德緣事革職○

庚申江南巡按衛貞元參奏江南按察使盧慎言婪贓數萬其父傳與弟二濟惡實迹並私餽貞元銀八千兩情節列款以聞命革慎言職盧傳盧二等及攜帶贓物嚴拏來京審擬具奏○辛酉刑部審實江南鄉試作弊一案正主考方猶擬斬副主考錢開宗擬絞同考官葉楚槐等擬責遣尙陽堡舉人方章鉞等俱革去舉人得旨方猶錢開宗差出典試經朕面諭務令簡拔眞才嚴絕弊竇輒敢違朕面諭納賄作弊大爲可惡如此背旨之人若不重加懲

治何以儆戒將來方猶錢開宗俱著卽正法妻子家產籍沒入官
葉楚槐周霖張晉劉廷桂田俊民郝惟訓商顯仁李祥光銀文燦
雷震聲李上林朱建寅王熙如李大升朱蒞王國禎龔勳俱著卽
處絞妻子家產籍沒入官已死盧鑄鼎妻子家產亦籍沒入官方
章鉞張明荐伍成禮姚其章吳蘭友莊允堡吳兆鸞錢威俱著責
四十板家產籍沒入官父母兄弟妻子併流徙甯古塔程度淵在
逃責令總督卽廷佐亢得時等速行嚴緝獲解如不緝獲伊等受
賄作弊是實爾部承問此案徇庇遲至經年且將此重情問擬甚
輕是何意見作速回奏餘如議

十二月乙丑敕諭厄魯特車臣台吉等曰帝王撫有四海畫土分
疆謹防關隘所以嚴中外安遠人也朕素以懷柔爲心欲與爾等
共享昇平凡屬小過絕不苛求乃邇年以來該督撫按屢奏爾等

侵犯內地攘奪牛馬抗拒官軍迫脅番人故特遣兵部右侍郎石圖理藩院啟心郎鼐格等勘明其事據奏云爾等入邊因向番人取貢並無他故然擅行內地輒肆攘奪爾等之咎在所難辭朕茲以寬大貸爾前愆所奪之物仍令賠補外但朕撫綏中外本無異視而疆圉出入自有大防不容踰犯今後邊內番人原係納貢於爾者仍聽爾屬爾等向屬番取貢當酌定人數路由正口先委頭目稟明守口各官方行入邊取貢毋得不委頭目不由正口零星闌入至貿易處所原有酌定市口著從西甯地方鎮海堡北川二口洪水一口出入不得任意往來取道他處爾其恪遵約束慎守疆圉副朕懷柔至意如或不悛仍前妄行闌入是爾等有負寬恩自取罪戾國憲具在朕不能私爾其慎之○贈廣東陣亡遊擊傅進忠官○乙亥吏部奏御史今增至六十員內升外轉亦應各增

一員每年內升三人外轉三人以免壅滯從之○戊寅贈死事泰

安縣知縣周盛時官○己卯以姚延著爲江南按察使

由廣東嶺南道參政

遷○裁五城兵馬司副指揮一○裁四川保甯順慶龍安三府同

知各一復設龍安府知府○辛巳倉場侍郎李呈祥請假遷葬允

之○壬午江西巡撫張朝璘奏故明宗姓朱議滄僞都督王祐僞

經畧彭坤等及僞文武官百餘眾三千餘人投誠○癸未諭吏部

中和殿學士蘇納海鄂莫克圖保和殿學士布顏尼滿文華殿學

士查布海白色純武英殿學士常鼎翰林院掌院學士折庫訥俱

著爲禮部左侍郎武英殿學士麻勒吉文淵閣學士胡兆龍東閣

學士艾元徵翰林院掌院學士王熙俱著爲禮部右侍郎○乙酉

以渥赫爲禮部尙書

由左侍郎遷

○吏部議覆御史馮班奏山東巡撫

耿焯縱所屬營弁肆虐地方捏報開墾屯地及地畝錢糧應革職

得旨耿焯著再降三級調用○裁河南歸德懷慶河南南陽汝甯等府同知各一○免浙江山陰等八縣去年被水額賦○丁亥先是刑部諸臣遵旨回奏審江南鄉試作弊一案耽延情由下吏部議至是吏部議尙書圖海白允謙侍郎吳喇禪杜立德郎中安珠護胡悉甯員外郎馬海主事周明新等讞獄疏忽分別革職革前程並所加之級仍罰俸得旨圖海等本當依議姑從寬免革職著革去少保太子太保並所加之級其無加級者著降一級畱任○戊子調林起龍爲倉場侍郎由工部左調○命固山額眞明安達禮爲安南將軍同固山額眞俄羅塞臣賽音達理等駐防貴州○己丑敕諭信郡王多尼吳三桂趙布泰等曰川湖雲貴之人皆朕臣庶寇亂以來久罹湯火今大兵所至有歸順者俱加意安撫令其得所能效力建功者不靳爵祿以示鼓勵王等卽徧行傳諭○是歲人

丁戶口一千八百六十三萬二千八百八十一田地山蕩四百九十八萬八千六百四十頃七十四畝畦地二萬二千六百四十三箇徵銀二千四百五十八萬四千五百二十六兩四錢米麥豆六百一萬八千一百三十二石八斗有奇草二百二十四萬二千六百一十九束中茶八萬六千三百六十錠行鹽四百七十七萬七千六十九引徵課銀二百五十一萬六千九百八十三兩七錢鑄釐錢一萬四千一十七萬三千九百九十有奇舊鑄銅錢二十萬一千二百一十有奇鈔十二萬八千一百七十二貫四百七十有奇